

**Տ. ՆԱՎԱՍԱՐԴ ԱՐՔԵՊԻՍԿՈՊՈՍ ԿՃՈՅԱՆԻ ՔԱՐՈԶԸ՝
ԽՈՍՎԱԾ Ս. ԷԶՄԻԱԾՆԻ ՄԱՅՐ ՏԱՃԱՐՈՒՄ
ԿԱԹՈՂԻԿԵ Ս. ԷԶՄԻԱԾՆԻ ՏՈՆԻ ԱՌԻԹՈՎ
(22 հունիսի, 2014 թ.)**

Յանուն Հօր եւ Որդւոյ եւ Հոգւոյն Սրբոյ. ամէն:

«Գեղեցկապաճոյճ մեզ քաւարան կազմեալ
Երբերանման կամարակապ զարդիք»:
Ս. Գրիգոր Նարեկացի

Այսօր բացառիկ օր է Հայաստանյայց Առաքելական Սուրբ Եկեղեցու համար եւ ողջ հայության կյանքում: Տոնն է Կաթողիկէ Սուրբ Էջմիածնի: **Էջմիածին...** Հայ ժողովրդի արյան կանչ, խաղաղության աղբյուր, մխիթարության օրրան, հոգեկան լույսի մշտամնա ջահ, աղոթքի բուրվառ եւ հավատքի տուն:

Այստեղ՝ այս տեղում, մեր Եկեղեցու հավատքի հայր Սուրբ Գրիգոր Լուսավորիչն արցունքի միջից տեսալ մեր Տիրոջ՝ Հիսուս Քրիստոսի լուսեղեն Էջը: Եւ Սուրբ Լուսավորչին, ով «**աստվածային Հոգու քաղցրախոս քնարն է**», հանձնվեց Աստծո Տաճարը կառուցելու բանալին: Այստեղ Հայոց Տրդատ արքան 301 թվականին պետական կրոն հռչակեց քրիստոնեությունը, եւ փրկարար լույսը՝ վկայված նահատակների արյամբ, հիմնովին խորտակեց անհավատության կռատներն ու մեհյանները եւ տարածվեց ամենուր: Ապա հայոց երկնակամարում թելածեց կանչը սրբագործված հոգիների. «**Եկայք շինեցուք սուրբ զխորանն լուսոյ...**» (Ս. Էջմիածնի շարական) ... Հայոց աշխարհ, հայի ոգի, հայի հավատք ու հայի խիղճ... Այս ամենի մեկտեղումից Քրիստոսաւէջ սրբազնագույն վայրում ծնված Մայր Տաճար ու երկուհազարամյա քրիստոնեական միասնության ոսկեզարկ կնիքով դրոշմված միաբանություն:

Սիրելիներ, հայության համար լույսի խորան դարձած Սուրբ Էջմիածինը հավերժի խորան է: Քանի՜ հարյուր հազար անգամ է հնչել այս անունը հայի շուրթերից՝ **ԷԶ-ՄԻԱԾԻՆ...** Խորախորհուրդ եւ ահասարսուռ իրողություն. հարուցյալ եւ համբարձյալ Տերը, թողնելով Իր երկնային փառքը, իջել է այստեղ՝ հայի հետ հանդիպելու, Հայկյան ցեղի մեջ ներթափանցելու եւ

մշտաբարբառ խոսելու. «Ես եմ ձեր Տերն ու Փրկիչը: Ինձնով ապրեք, Ինձնով ապաշխարեք, Ինձնով արարեք եւ Ինձնով փնտրեք Լույսը Փրկչական»: Եւ «**ի սմա ծագեաց մեզ լոյս ի Հայաստան աշխարհի**»:

Սիրելի՛ եղբայրներ եւ քույրեր, մենք այսօր պետք ունենք անսալու աստվածային կանչին, պետք ունենք նորոգվելու, սիրո անաղարտ տաճարներ դառնալու՝ այս Տաճարին արժանանալու համար: Արդ, եկե՛ք միասնաբար այս հոգեցունց աղոթքին խառնենք մեր մտքերն ու հոգիները, գոհաբանական խոսքեր ասենք եւ ուխտենք՝ այն պահելով մեր սրտի անկիզբի մատյանում. «**Տէր մեր եւ Փրկիչ Յիսուս Բրիստոս, որ աղօթքով Քո բազմաչարչար վկայի եւ մեր հաւատոյ հօր՝ Սուրբ Գրիգոր Լուսաւորչի միջնորդութեամբ, մեծ փառքով եւ Քո լուսեղէնների բազմութեամբ երկնից իջար, ո՛վ Յիսուս, ի դաշտն Արարատեան ի յայցելութիւն փոքու հօտին Քո ազգս Հայոց: Եւ յատկապես ցոյց տուիր Քո սէրն ու ողորմութիւնը հանդէպ մեզ Քո այստեղ իջնելովը: Եւ ոսկի ուռով բախեցիր անդունդների խորքը եւ հալածեցիր սանդարամետի բնակիչները, որտեղ Քո լուսածէւ յօրինումով հրաշագործեցիր զՄայր Աթոռն զՍուրբ Էջմիածին եւ նրան վերածեցիր Քո աստուածային շնորհների անսպառելի շտեմարանի. նրան վերածեցիր ծնողի, դաստիարակի եւ մեր Հայաստանեայց բոլոր եկեղեցիների կատարելագործողի: Արդ, ո՛վ Տէր, պահեա զնա անարատ, մաքուր եւ անաղոտ՝ մեր բոլոր եկեղեցիների պայծառութեան համար մինչեւ աշխարհի վերջը**» (Ժամագիրք):

Փա՛նք եւ գոհություն Բարձրյալն Աստծուն, Ով պարգևեց մեզ հոգեւոր եղբայրության եւ միասնության հոգին ու միաբանելով այս սրբազնասուրբ վայրում՝ մեր՝ առաջին քրիստոնեական ազգի եւ պետության ծննդավայրում, շնորհ արեց մեկ անգամ եւս պանծացնելու Հայոց Բեթղեհեմ դարձած Մայր Եկեղեցու ծնունդը:

Սիրելիներ, թող Կաթողիկէ Սուրբ Էջմիածինն այսօր տարրալուծվի ու սփռվի մեր հոգիներից ներս, դառնա Միածնի իջման եւ լույսի խորան, որպեսզի նորոգված հնչեղությամբ, Սուրբ Նարեկացու խոսքերով փառավորենք Աստծուն՝ ասելով. «**Բրիստոս Փրկչին՝ քեզ պսակողին, վայելում է փառք յափտեանս, ամէն**» (Ս. Գրիգոր Նարեկացի):

«Էջմիածին՝ տուն աղօթից ամենայն հաւատացելոց եւ Աթոռ քահանայապետութեան»:

Վեհափա՛ն Տեր, եկել ենք Ձերդ Սրբության օրհնությունը ստանալու: Օրհնեցե՛ք մեզ, Վեհափա՛ն Տեր: Աստված թող անասան պահի մեր Հայրապետական Աթոռը ի Հայաստան եւ ի սփյուռս աշխարհի, եւ թող Ձեր ընդհանրական հովվապետական գավազանը հովվի ու առաջնորդի մեզ ամենքիս:

Այսօր ուխտավորաբար Մայր Աթոռում է գտնվում Երուսաղեմի ամենապատիվ պատրիարք Տ. Նուրհան արք. Մանուկյանը: Բազում անգամներ ենք եղել Տիրոջ Սուրբ Տեղերում: Բազմիցս լսել՝ «Ուխտդ ի կատար, հայ՝ ուխտա-

վոր» բաղձալի խոսքերը: Այսօր Դուք, Ձեր պատրիարքության ընթացքին, առաջին անգամ եք եկել Սրբություն Սրբոց Մայր Աթոռ Սուրբ Էջմիածին՝ Ձեր ուխտը նորոգելու: Այս բարեբաստիկ առիթով ողջունում ենք եւ մաղթում. «Ուխտդ ի կատար, Հայո՛ց Երուսաղեմ»:

Արարաւայան Հայրապետական թեմի ուխտավորների մեջ է ՀՀ նախագահ Սերժ Սարգսյանը: Միրելի՛ նախագահ, սրբազնասուրբ այս տաճարը կառուցվել է Հայոց Տրդատ թագավորի՝ Մասիսից բերված քարերով: Նա այդ քարերը բերեց իր ուսերին դրած, նրա բեռը ծանր էր, սակայն քաղցրությամբ կրեց այն եւ քրիստոնեությունը հռչակեց պետական կրոն: Թող Ձեր լուծն էլ քաղցր լինի այն նպատակի համար, որին հանձնառու եղաք: Ուխտդ ի կատար, տիա՛ր նախագահ:

Շնորհքը, սերը, խաղաղությունը թող լինի ձեզ հետ այսօր, վաղը եւ ընդմիշտ. ամեն: